

D'an 9 a viz C'hwevrer 2026

DANVEZ : dazont steuñv adperc'hennañ hor yezhoù votet e miz Kerzu 2023

Aotrou Prezidant,

Embannet ho peus e vo dalc'het gant yalc'hadoù ar programm 301 (yezhoù Breizh), e-lec'h m'eo bet digresket pe kresket kalz programmoù all, ha kement-se pa vez redioù gwirion e budjed Rannvro Breizh.

Nec'het omp koulskoude gant dazont ar Steuñv evit adperc'hennañ yezhoù Breizh a oa bet degemeret a-unvouezh gant ar C'huzul-rannvro e miz Kerzu 2023. Evit gwir, yalc'hadoù ar programm 301 a glote gant ar steuñv-se betek 2025. Padal, pa vez lennet ar budjed kentañ evit 2026 ha pa seller ouzh ar budjedoù bet votet abaoe 2024, e seblant en arvar ar Steuñv evit adperc'hennañ yezhoù Breizh.

Gant ar steuñv-se e oa bet rakwelet un treizhent budjed liesvloaziek evit ar prantad 2024-2026 evit skoazellañ ur strategiezh evit kreskiñ treuzkas ar brezhoneg. Reiñ a rae an tu d'an obererien a sell ouzh se ivez da gregiñ e raktresoù frammus war greenn dermen. Evel-se e oa bet doujet d'an hentad budjed-se e budjedoù kentañ 2024 ha 2025.

Ar budjed kentañ evit 2026 a ziskouez e vo enskrivet 600 000 € nebeutoc'h tra ma lavar an teul budjed emañ « **ar bloavezh 2026 o kenderc'hel da lakaat ar Steuñv e pleustr** ». Tost da 1 000 000 € e vo ar c'hemm e 2027 ma vo kadarnaet ma vo skornet steuñv adperc'hennañ yezhoù Breizh.

Gouzout a reomp ar redioù bras a zo war budjed ar Rannvro, met degas a reomp da soñj koulskoude emañ pell ar sammad-se diouzh al live engouestlañ war programmoù rannvroel frammus all. Evel-se e notennomp e kresk budjed ar fiñvusted eus 100 milion a euroioù (+22%) pe hini ar porzhioù eus 27 milion (+44%).

Koulskoude ne c'haller ket sellet ouzh an diforc'h a 600 000 € evel un dra dister e-keñver gwander ekonomikel kevredigezhioù ar gennad, skoet dija gant un isarc'hantaouiñ frammadurel. **An emdroadur-se a laka en arvar ar steuñv evit adperc'hennañ yezhoù Breizh end-eeun.**

Degas a reomp da soñj c'hoazh, ma komprenomp mat-tre redioù budjed gwirion ar strollegezh, e oa kreñv-kenañ ar re-se ha kreñvoc'h zoken e 2025, hep ma oa nullet an treizhent budjed ar steuñv. Etre 2025 ha 2026 e weler eo stabil ar gounidoù evit ar rannvro e gwirionez. Evel-se hon eus desket ne vefe digresket an debarzhadurioù er bloaz-mañ nemet 2,6 milion a euroioù, gant Raktres Lezenn an Arc'hant e 2026 hag ar stignad daskeitañ etre ar strollegezhioù, da lavaret eo kalz nebeutoc'h eget e 2025. Gallout a reer gwelet zoken eo kresket ar gounidoù e-maez amprest etre an diviz daskemm niv. 1 e budjed Meurzh 2025 hag ar budjed kentañ e 2026, da lavaret eo un diforc'h eus + 11,53 milion.

Rak-se e kavomp n'eo ket reizh digreskiñ ar sammad eus 600 000 € rakwelet evit ar steuñv adperc'hennañ yezhel e 2026. Ur bern kevredigezhioù o doa stourmet a-gevret evit kaout ar steuñv-se ha laouen e oant, a-benn ar fin, gant ar c'hoant da sevel ur politikerezh yezh solutaet, buhezek evit treuzkas ar brezhoneg ha kement-se en ur blegenn diasur dija war ar budjed. An oberoù rakwelet gant ar steuñv a vez lakaet da dalvezout bremañ, dreist-holl war-bouez implijoù krouet pe padus gant ar c'hevredigezhioù hag a gemer harp war an hentad budjed lakaet da dalvezout e 2023.

Er blegenn-se e seblant bezañ dislavaret « ***lakaat steuñv adperc'hennañ yezhoù Breizh da dalvezout en un doare youlek*** » pa weler dibaboù ar budjed hag an divizoù pleustrek bet kemeret. Ret eo neuze d'ar Rannvro adsevel buan en he budjed evit 2026, pe pa vo divizet ur c'hemm er budjed, an treizhent budjed kentañ enskrivet er steuñv adperc'hennañ.

Evit a sell ouzh obererezh 3 ar steuñv evit Diwan, n'eus titour ebet diwar-benn lakaat e pleustr ar studiaden embannet a denn d'ur benveg portezañ war ar font a oa da vezañ boulc'het e 2024 tra m'emañ ar pezh a sell ouzh kudenn ar savadurioù e-kreiz diorren ha padusted skolioù ar c'hevread.

Erfin, ar c'hevredigezhioù zo e dalc'h ar **programm 301** zo bet kelaouet dre bostel d'an **22 a viz Genver 2026** penaos e vo paeet strizh ar yalc'hadoù mont en-dro daspouezet gant ar c'hargoù engouestlet da vat e dibenn an embregvezh. Ma'z eo reizh ha gant gwir abeg kontroliñ an implij eus ar an arc'hant publik war ziazez ar c'hontoù hag obererezh gwirion ar c'hevredigezhioù, e vefe ar reolenn sistematek nevez bet embannet un efed daou-boan ma ne zeufe ket da wir engouestl un arc'hanter all, kement-se en desped da strivoù merañ atebek hor frammoù implijerien.

Ouzhpenn-se, pa vo lakaet ar reolenn da dalvezout ingal e vo kastizet ar frammoù a gemero diarbennoù reizhañ war kargoù o budjed ma vez kaset da benn produioù izeloc'h eget pezh oa rakjedet. Evel-se e vo kastizet mererezh strizh-kenañ ar frammoù bep bloaz evit kempouezañ o budjed e gwirionez. **Goulenn a reomp diganeoc'h paouez gant hollekaat emgfreek ar reolenn-se** evit ar pezh a sell ouzh ar yalc'hadoù mont en-dro, pe, d'an nebeutañ, lakaat anezhi da dalvezout diouzh live ar fontoù a zo gant pep framm pe c'hoazh hervez an implijoù hag an obererezhioù da virout.

Goulenn a reomp eta diganeoc'h, an Aotrou Prezidant Kuzul-rannvro Breizh, en anv an holl gevredigezhioù o sinañ al lizher-mañ,, ma vo doujet da engouestloù steuñv adperc'hennañ yezhoù Breizh votet a-unvouezh e miz Kerzu 2023. Sed aze ivez ster an ali bet votet gant Kuzul Sevenadurel Breizh diwar-benn ar programm 301 d'an 31 a viz Genver tremenet.

Gant ma vo dalc'het kont ganeoc'h eus hol lizher. Resevit eta Aotrou Prezidant hor gwellañ soñjoù..

Roll ar c'hevredigezhioù o sinañ :

Al Liamm

Al Lanv

Ar Falz / Skol Vreizh

Ar Redadeg

Arvorig FM

Bannoù Heol

Bodadeg ar Gouren

Brudañ ha Skignañ

Bruzhoneg

C'hoariva

CEBEP 44 (Collectif pour l'enseignement du Breton à l'école Publique)

Daoulagad Breizh

Div Yezh Breizh

Divaskell Breizh

Diwan

Emglev Bro an Oriant

Emglev Bro Douarnenez

Kanomp Breizh

KEAV (Kamp Etrekeltieg ar Vrezhonegerien)

Keit Vimp Bev

Kelennomp!

Kevre Breizh

KLT - Ti ar Vro Montroulez

Kuzul ar Brezhoneg

Mervent

Mat ar jeu Teatr

Mignoned Ar Brezhoneg

Mouladurioù Hor Yezh

Patati

Radio Bro Gwened

Radio Kerne

Radio Kreiz Breizh

Radio Naoned

Radio Treger Goueloù

Raok

Roudour

Sked

Skeudenn Bro Roazhon

Skol an Emsav

Skol Ober

Stumdi

Telenn - Ti ar Vro - l'Ôté

Ti ar vro Bro Gwened

Ti ar vro Bro Leon

Ti ar vro Dmeurance Dinan

Ti ar Vro Gwengamp

Ti ar vro Kemper

Ti ar Vro Kemperle

Ti ar vro Landerne Daoulaz

Ti ar vro Bro Pondi

Ti ar vro Treger

Ti Brezhoneg ar Vro Vigouden

Ti Douar Alre

Timilenn

Yezhoù ha Sevenadur